



A Coruña, 3 de agosto de 2010. A [Plataforma para a Defensa da Ría do Burgo](#), integrada por máis de 30 asociacións ecoloxistas, veciñais, políticas, deportivas e empresariais, decidiu levar o problema de degradación deste espazo ao Parlamento Europeo, ao considerar que a **pasividade e a connivencia**

das autoridades responsábeis (Estado, Xunta e concellos de A Coruña, Oleiros, Cambre e Culleredo) está creando unha situación de

emerxencia ambiental

e poñendo en risco continuado a saúde humana. Aliás este

sábado 7 de agosto ás 11:30h

concentrarémomos na praza do Toural en Compostela, para protestar pola contaminación da ría e amosar as evidencias do seu pésimo estado. Baixa a

[Denuncia UE RÍA DO BURGO \(185 Kb\)](#)

No escrito presentado perante a **Comisión de Peticións do Parlamento Europeo** denúncias e o incumprimento de até tres directivas europeas:

-Directiva 79/923/CEE, en relación coa calidade das augas.

-Directiva 91/271/CEE, relativa ao tratamento de augas residuais urbanas, que leva un retraso de dez anos no seu cumprimento, xa que A Coruña aínda non conta con EDAR.

-Directiva 2006/113/CE, sobre a calidade esixida nas augas destinadas á cría de moluscos que obriga a tomar medidas para reducir a contaminación existente.

Tanto ADEGA como a propia Plataforma consideramos moi importante que se delimiten as responsabilidades de cada institución para evitar que segan sen facerse cargo do problema.

Todas as administracións son culpábeis: tanto o estado español (Ministerio de medio Ambiente, Rural e Mariño) con competencias no DPMT e no control das verteduras ao mar; como a Xunta de Galiza (Augas de Galiza, Consellería de Medio Ambiente, Territorio e Infraestruturas e Consellería do Mar) e os concellos afectados que limitan coa ría do Burgo (A Coruña, Oleiros, Cambre e Culleredo) incumpriron as leis, e portanto fican agora denunciadas perante a UE.

Dende 1986 levamos escoitando promesas de saneamento da ría do Burgo, que polo de agora para o único que serviron foi para encher xornais e panfletos eleitorais, namentres o lamas contaminadas ían acumulándose até chegar aos 1,90 metros de espesor, facendo inviábel a produción de bivalvos. Por iso, se as administración competentes non cumpren coa súa función de sanear a ría, confiamos que as sancións da UE obríguenlles a tomar dunha vez en serio este problema denantes de que a situación sexa irreversible.

E por isto que ADEGA, xunto cos demais colectivos que fan parte da Plataforma, esiximos:

- Rematar coa contaminación causada polas verteduras directas á ría do Burgo.

- Imposición de sancións exemplares para os causantes das verteduras, constantes e reiteradas nos últimos anos, e das que o SEPRONA ten cumpridos datos.

- A posta en marcha con carácter urxente dun proxecto integral de saneamento e rexeneración medioambiental da ría.

- A inmediata posta en funcionamento do EDAR de Bens, xa que A Coruña é a única grande cidade do estado que aínda non conta cunha depuradora de augas residuais.